

四庫全書

集部

欽定四庫全書

集部

李義山詩集卷下

詳校官監察御史_臣查瑩

檢討_臣何思鈞覆勘

總校官檢討_臣何思鈞

校對官編修_臣戴聯奎

謄錄監生_臣孫起楠

欽定四庫全書

李義山詩集卷下

唐 李商隱 撰

正月十五夜聞京有燈恨不得觀

月色燈光滿帝都香車寶輦溢通衢身閒不覩中興盛
羞逐鄉人賽紫姑

贈趙協律哲

俱識孫公與謝公二年歌哭處還同已叨鄰馬聲華末

更共劉盧族望通

愚與趙俱出今吏部相公門下又同為故尚書安平公所知復皆是安平

姪公表

南省恩深賓館在東山事往妓樓空不堪歲暮相

逢地我欲西征君又東

搖落

搖落傷年日羈留念遠心水亭吟斷續月幌夢飛沈古
木含風久踈螢怯露深人間始遙夜地迴更清砧結愛
曾傷晚端憂復至今未諳滄海路何處玉山岑難急黃
牛暮雲屯白帝陰遙知霑灑意不減欲分襟

滯雨

滯雨長安夜殘燈獨客愁故鄉雲水地歸夢不宜秋

偶題二首

小亭閒眠微醉消山榴海栢枝相交水紋簾上琥珀枕
傍有墮釵雙翠翹

清月依微香露輕曲房小院多逢迎春叢定是饒棲鳥
飲罷莫持紅燭行

月

過水穿樓觸處明
藏人帶樹遠含清
初生欲缺虛惆悵
未必圓時卽有情

夜冷

樹繞池寬月影多
村砧塢笛隔風蘿
西亭翠被餘香薄
一夜將愁向敗荷

正月崇讓宅

密鎖重關掩綠苔
廊深閣迴此徘徊
先知風起月含暈
尚自露寒花未開
蝙拂簾旌終展轉
鼠翻窻網小驚猜

背燈獨共餘香語不覺猶歌夜起來

城外

露寒風定不無情臨水當山又隔城未必明時勝蟬蛤
一生長共月虧盈

撰彭陽公誌文畢有感

延陵留表墓峴首送沈碑敢伐不加點猶當無愧詞百
生終莫報九死諒難追待得生金後川原亦幾移

北青蘿

殘陽西入崦茅屋訪孤僧落葉人何在寒雲路幾層獨
敲初夜磬閒倚一枝藤世界微塵裏吾寧愛與憎

戲贈張書記

別館君孤枕空庭我閉關池光不受月野氣欲沈山星
漢秋方會關河夢幾還危絰傷遠道明鏡惜紅顏古木
含風久平蕪盡日閒心知兩愁絕不斷若尋環

幽人

丹竈三年火蒼崖萬歲藤樵歸說逢虎棋罷正留僧星

斗同秦分人煙接漢陵東流清渭苦不盡照衰興

念遠

日月淹秦甸江湖動越吟蒼梧應露下白閣自雲深
皎皎非鸞扇翹翹失鳳簪牀空鄂君被杵冷女嬃砧
北思驚沙鴈南情屬海禽關山已搖落天地共登臨

過故崔充海宅與崔明秀才話舊因寄舊僚杜趙
李三掾

絳帳恩如昨烏衣事莫尋諸生空會葬舊掾已華簪共

入留賓驛俱分市駿金莫憑無鬼論終負托孤心

微雨

初隨林靄動稍共夜涼分窓迴侵燈冷庭虛近水聞

南山趙行軍新詩盛稱遊讌之洽因寄一絕

蓮幕遙臨黑水津
縈韉無事但尋春
梁王司馬非孫武
且免宮中斬美人

曲江

望斷平時翠輦過
空聞子夜鬼悲歌
金輿不返傾城色

玉殿猶分下苑波
死憶華亭聞唳鶴
老憂王室泣銅駝
天荒地變心雖折
若比傷春意未多

景陽井

景陽宮井剩堪悲
不盡龍鸞誓死期
腸斷吳王宮外水
濁泥猶得葬西施

故番禺侯以賊罪致不辜
事覺母者他日過其門
飲鴆非君命
茲身亦厚亡
江陵從種橘
交廣合投香
不見千金子
空餘數仞牆
殺人須顯戮
誰舉漢三章

詠雲

捧月三更斷藏星七夕明纔聞飄迴路旋見隔重城潭
暮隨龍起河秋壓鴈聲只應唯宋玉知是楚神名

夜出西溪

東府憂春盡西溪許日曛月澄新漲水星見欲銷雲柳
好休傷別松高莫出羣軍書雖倚馬猶未當能文

效長吉

長長漢殿眉窄窄楚宮衣鏡好鸞空舞簾疎燕誤飛君

王不可問昨夜約黃歸

柳

江南江北雪初銷漠漠輕黃惹嫩條
灞岸已攀行客手
楚宮先騁舞姬腰
清明帶雨臨官道
晚日含風拂野橋
如線如絲正牽恨
王孫歸路一何遙

九月於東逢雪

舉家欣共報秋雪墮前峯嶺外他年憶於東
此日逢粒輕還自亂花薄未成重
豈是驚離鬢應來洗病容

四皓廟

本為留侯慕赤松漢庭方識紫芝翁蕭何只解追韓信
豈得虛當第一功

送阿龜歸華

草堂歸意背煙蘿黃綬垂腰不奈何因汝華陽求藥物
碧松根下茯苓多

九日

曾共山翁把酒時霜天白菊遶階墀十年泉下無消息

九日樽前有所思不學漢臣裁
昔看空教楚客詠江離
郎君官貴施行馬東閣無因
再得窺

僧院牡丹

葉薄風纔倚枝輕霧不勝開
先如避客色淺為依僧粉
壁正蕩水綳幃初卷燈傾城
唯待笑要裂幾多繒

贈司勳杜十三員外

杜牧司勳字牧之清秋一首杜秋詩前身應是梁江總
名揔還曾字揔持心鐵已從干鎔利鬢絲休歎雪霜垂

漢江遠弔西江水羊祜草丹盡有碑

時杜奉詔撰碑

高花

花將人共笑籬外露繁枝宋玉臨江宅牆低不礙窺

嘲花

無賴天桃面平明露井東春風為開了却擬笑春風

送豐都李尉

萬古商於地憑君泣路岐固難尋綺季可得信張儀雨
氣燕先覺葉陰蟬遽知望鄉尤忌晚山晚更參差

天平公座中呈令狐令公時蔡京在座京曾為僧
徒故有第五句

罷執霓旌上醺壇慢粧嬌樹水晶盤更深欲訴蛾眉斂
衣薄臨醒玉艷寒白足禪僧思敗道青袍御史擬休官
雖然同是將軍客不敢公然子細看

席上贈人

故桂林榮陽公
席上出家妓

淡煙微雨忽高唐一曲清聲遶畫梁料得也應憐宋玉
只因無奈楚襄王

餞席重送從叔余之梓州

莫歎萬重山君還我未還武關猶悵望何況百牢關

訪隱

路到層峯斷門依老樹開月從平楚轉泉自上方來薤
白羅朝饌松黃暖夜盃相留笑孫綽空解賦天台

寓興

薄官仍多病從知竟遠遊談諧叨客禮休澣接眞搜樹
好頻移榻雲竒不下樓豈關無景物自是有鄉愁

東南

東南一望日中烏
欲逐羲和去得無
且向秦樓棠樹下
每朝先覓照羅敷

歸來

舊隱無何別歸來
始更悲難尋白道士
不見惠禪師草
逕蟲鳴急沙渠水下
遲却將波浪眼清曉
對紅梨

子直晉昌李花

吳館何時燠秦臺
幾夜熏綃輕誰解
卷香異自先聞月

裏誰無妙雲中亦有君樽前見飄蕩愁極客襟分

河清與趙氏昆季讌集得擬杜工部

勝槩殊江右佳名逼渭川虹收青嶂雨鳥沒夕陽天客
鬢行如此滄波坐眇然此中真得地漂蕩釣魚船

寓目

園桂懸心碧池蓮飫眼紅此生真遠客幾別卽衰翁小
愧風煙入高窓霧雨通新知他日好錦瑟傍朱櫳

題道靖院院在中條山故王顏中丞所置號州刺

史捨官居此今寫真存焉

紫府丹成化鶴羣
青松手植變龍文
壺中別有仙家日
嶺上猶多隱士雲
獨坐遺芳成故事
褰帷舊貌似元君
自憐築室靈山下
徒望朝嵐與夕曛

賦得桃李無言

天桃花正發穠李
葢方繁應候非爭
艷成蹊不在言靜
中霞暗吐香處雪
潛翻得意搖風態
含情泣露痕芬芳
光上苑寂默委中
園赤白徒自許幽
芳誰與論

登霍山驛樓

廟列前峯迴樓開四望窮嶺巖嵐色外陂鴈夕陽中弱
柳千條露衰荷一向風壺闕有狂孽速繼老生功

寄和水部馬郎中題興德驛時昭義已平

仙郎倦去心鄭驛暫登臨水色瀟湘潤沙程朔漠深鷗
舟時往復鷗鳥恣浮沈更想逢歸馬悠悠岳樹陰

題小松

憐君孤秀植庭中細葉輕陰滿座風桃李盛時雖寂寞

雪霜多後始青蔥一年幾變枯榮事百尺方資柱石功
為謝西園車馬客定悲搖落盡成空

行次昭應縣道上送戶部李郎中充昭義攻討

將軍大旆掃狂童詔選名賢贊武功暫逐虎牙臨故絳
遠含雞舌過新豐魚遊沸鼎知無日鳥覆危巢豈待風
早勒勲庸燕石上佇光綸綍漢庭中

水齋

多病欣依有道邦南塘晏起想秋江卷簾飛燕還拂水

開戶暗蟲猶打窓更開前頭已披卷仍斟昨夜未開缸
誰人為報故交道莫惜鯉魚時一雙

奉同諸公題河中任中丞新菴河亭四韻之作

萬里誰能訪十洲新亭雲構壓中流河蛟縱翫難為室
海蜃遙驚恥化樓左右名山窮遠目東西大道鎖輕舟
獨留巧思傳千古長與蒲津作勝遊

過故府中武威公交城舊莊感事

信陵亭館接郊畿幽象遙通晉水祠日落高門喧燕雀

風飄大樹撼熊羆
新蒲似筆思投日
芳草如茵憶吐時
山下祇今黃絹字
淚痕猶墮六州兒

贈田叟

荷篠衰翁似有情
相逢攜手繞村行
燒畬曉映遠山色
伐樹暝傳深谷聲
鷗鳥忘機翻浹洽
交親得路昧平生
撫躬道直誠感激
在野無賢心自驚

贈別前蔚州契苾使君

使君遠祖國
初功臣也

何年部落到陰陵
奕世勤王國史稱
夜卷牙旗千帳雪

朝飛羽騎一河水蕃兒極負來青冢狄女壺漿出白登
日晚鵲鵲泉畔獵路人遙識郅都鷹

和人題真娘墓

真娘吳中樂妓墓
在虎邱山下寺中

虎邱山下劒池邊長遣遊人歎逝川
冑樹斷絲悲舞席
出雲清梵想歌筵柳眉空吐效顰
葉榆英還飛買笑錢
一自香魂招不得祇應江上獨嬋娟

人日卽事

文王喻復今朝是子晉吹笙此日同
舜格有苗旬太遠

周稱流火月難窮
鏤金作勝傳荆俗
翦綵為人起晉風
獨想道衡詩思苦
離家恨得二年中

春日寄懷

世間榮落重逡巡
我獨邱園坐四春
縱使有花兼有月
可堪無酒又無人
青袍似草年年定
白髮如絲日日新
欲逐風波千萬里
未知何路到龍津

和劉評事永樂間居見寄

白社幽閒君暫居
青雲器業我全疎
看封諫草歸鸞掖

尚賁衡門待鶴書蓮簷碧峯關路近荷翻翠扇水堂虛
自探典籍忘名利歌枕時驚落蠹魚

和馬郎中移白菊見示

陶詩只採黃金實鄧曲新傳白雪英素色不同籬下發
繁花疑自月中生浮盃小摘開雲母帶露旋移綴水精
偏稱含香五字客從茲得地始芳榮

喜聞太原同院崔侍御臺拜兼寄在臺三二同年
之什

鵬魚何事遇屯同雲水升沈一會中劉放未歸雞樹老
鄒陽新去兔園空寂寥我對先生柳赫奕君乘御史驄
若向南臺見鶯友為傳垂翅度春風

喜雪

朔雪自龍沙呈祥勢可嘉有田皆種玉無樹不開花班
扇慵裁素曹衣詎比麻鶯歸逸少宅鶴滿令威家寂寞
門扉掩依稀履跡斜人疑遊麴市馬似困鹽車洛水妃
虛妬姑山客謾誇聯詞追許謝和曲本慙巴粉署闌全

隔霜臺路漸賒此時傾賀酒相望在京華

柳枝五首 有序

柳枝洛中里娘也父饒好賈風波死湖上其母不念他
兒子獨念柳枝生十七年塗粧綰髻未嘗竟已復起去
吹葉嚼蕊調絲擲管作天海風濤之曲幽憶怨斷之音
居其傍與其家接故往來者聞十年尚相與疑其醉眠
夢物斷不娉余從昆讓山比柳枝居為近他日春曾陰
讓山下馬柳枝南柳下詠余燕臺詩柳枝驚問誰人有

此誰人為是讓山謂曰此吾里中少年叔耳柳枝手斷
長帶結讓山為贈叔乞詩明日余比馬出其巷柳枝丫
鬟畢粧抱立扇下風郭一袖指曰若叔是句後三日隣
當去滌裙水上以博山香待與郎俱過余諾之會所友
有偕當詣京師者戲盜余卧裝以先不果留雪中讓山
至且曰為東諸侯取去矣明年讓山復東相背於戲
上因寓詩以墨其故處云

花房與蜜脾蜂雄蛺蝶雌同時不同類那復更相思

本是丁香樹春條結始生玉作彈碁局中心亦不平

嘉瓜引蔓長碧玉冰去寒漿東陵雖五色不忍值牙香

柳枝井上蟠蓮葉浦中乾錦鱗與繡羽水陸有傷殘

畫屏繡步障物物自成雙如何湖上望只是見鴛鴦

燕臺詩四首

風光冉冉東西陌幾日嬌魂尋不得蜜房羽客類芳心
冶葉倡條遍相識暖藹輝遲桃樹西高鬟立共桃鬟齊
雄龍雌鳳杳何許絮亂絲繁天亦迷醉起微陽若初曙

映簾夢斷聞殘語愁將鐵網罥珊瑚海闊天翻迷處所
衣帶無情有寬窄春煙自碧秋霜白研丹礪石天不知
願得天牢鎖冤魄夾羅委篋單綃起香肌冷襯瑤瑤佩
今日東風自不勝化作幽光入西海

右春

前閣雨簾愁不卷後堂芳樹陰陰見石城景物類黃泉
夜半行郎空拓彈綾扇喚風閣闔天輕帷翠幕波洄旋
蜀魂寂寞有伴未幾夜瘴花開木棉桂宮流影光難取

金匱要略卷下
媽薰蘭破輕輕語直教銀漢墮懷中未遣星妃鎮來去
濁水清波何異源濟河水清黃河渾安得薄霧起細裙
手接雲輶呼太君

右夏

月浪衝天天宇濕涼蟾落盡疎星入雲屏不動掩孤嘖
西樓一夜風箏急欲織相思花寄遠終日相思却相怨
但聞北斗聲迴環不見長河水清淺金魚鎖斷紅桂春
古時塵滿鴛鴦茵堪悲小苑作長道玉樹未憐亡國人

瑤瑟悵悵藏楚弄越羅冷薄金泥重簾鈎鸚鵡夜驚霜
喚起南雲繞雲夢雙瑤丁丁聯尺素內記湘川相識處
歌唇一世銜雨看可惜馨香手中故

右秋

天東日出天西下雌鳳孤飛女龍寡青溪白石不相望
堂中遠甚蒼梧野凍壁霜華交隱起芳根中斷香心死
浪乘畫舸憶蟾蜍月娥未必嬋娟子楚管蠶絃愁一槃
空城舞罷腰支在當時歡向掌中銷桃葉桃根雙姊妹

破鬟矮墮凌朝寒白玉燕釵黃金蟬風車雨馬不持去
蠟燭啼紅怨天曙

右冬

贈送前劉五經映三十四韻

建國宜師古興邦屬上庠從來以儒戲安得振朝綱叔
世何多難茲基遂已亡泣麟猶委吏歌鳳更佯狂屋壁
餘無幾焚坑逮可傷挾書秦二世壞宅漢諸王草草臨
盟誓區區務富強微茫金馬署狼藉鬪雞場盡欲心無

竅皆如面正牆驚疑豹文鼠貪竊虎皮羊南渡宜終否
西遷冀小康策非方正士貢絕孝廉郎海鳥悲鐘鼓狙
公畏服裳多岐空擾擾幽室竟佺佺疑邈為時範虛空
作士常何由羞五霸直自些三皇別派驅楊墨他鑣並
老莊詩書資破冢法制困探囊周禮仍存魯隋師果禪
唐鼎新麾一舉革故法三章星宿森文雅風雷起退藏
縲因為學切掌故受經忙夫子時之彥先生跡未荒褐
衣終不召白首興難忘感激誅非聖棲遲到異糧片詞

褒有德一字貶無良燕地尊鄒衍西河重卜商式閭真

道在擁篲信謙光

外舅太原公亦受經於公也

獲預青衿列叨來終

帳旁雖從各言志還要大為防勿謂孤寒棄深憂計直
妨叔孫讒易得盜跖暴難當鴈下秦雲黑蟬休隴葉黃
莫渝巾屨念容許後升堂

河內詩二首

鼉鼓沈沈虬水咽秦絲不上蠻絃絕姮娥衣薄不禁寒
蟾蜍夜豔秋河月碧城冷落空濛煙簾輕幕重金鈎欄

靈香不下兩皇子孤星直上相風竿八桂林邊九芝草
短襟小鬢相逢道人門暗數一千春願去閨年留月小
梔子交加香蓼繁停辛佇苦留待君

右一曲樓上

閨門日下吳歌遠陂路綠菱香滿滿後溪暗起鯉魚風
船旗閃斷芙蓉幹輕身奉君畏身輕雙橈兩槳樽酒清
莫因風雨罷團扇此曲斷腸唯此聲低樓小徑城南道
猶自金鞍對芳草

右一曲湖中

哭遂州蕭侍郎二十四韻

遙作時多難先令禍有源初驚逐客議旋駭黨人冤
侍榮方入司刑望愈尊皆因優詔用實有諫書存
苦霧三辰沒窮陰四塞昏虎威狐更假隼擊鳥逾喧
徒欲心存闕終遭耳屬垣遺音和蜀魄易簣對巴猿
有女悲初寡無男泣過門

公止裴氏一女結褵之明年又喪良人

朝爭屈原草廟餒

莫教魂迴閣傷神峻長江極望翻青雲寧寄意白骨始

霑恩早歲思東閣為邦屬故園

余初謁於鄭舍

登舟慙郭泰解

榻愧陳蕃分以忘年契情猶錫類
敷公先真帝子我系本王孫
嘯傲張高蓋從容接短轅
秋吟小山桂春醉後堂萱自歎
離通籍何嘗忘叫閤不成穿
墻入終擬上書論多士還魚
貫云誰正駿奔暫能誅倏忽
長與問乾坤蟻漏三泉路
蟹啼百草根始知同泰講
微福是虛言

送千牛李將軍赴闕五十韻

照席瓊枝秀當年紫綬榮
班資古直閣勲伐舊西京在

昔王綱素因誰國步清如無一戰霸安有大橫庚內豎
依憑切凶門責望輕中台終惡直上將更要盟丹陛祥
煙滅皇聞殺氣橫喧闐衆狙怒容易八蠻驚禱祀寬之
久防風幾不行素來矜異類此去豈親征捨魯真非策
居幽未有名曾無力收御寧待雨師迎火箭侵乘石雲
橋逼禁營何時絕刁斗不夜見攬槍屢亦聞投鼠誰其
敢射鯨世情休念亂物議笑輕生大鹵思龍躍蒼梧失
象耕靈衣沾媿汗儀馬困陰兵別館蘭薰酷深宮蠟焰

明黃山遮舞態黑水斷歌聲縱未移周鼎何辭免趙坑
空卷轉鬪地數板不沈城且欲憑神筭無因計力爭幽

囚蘇武節棄市仲由纓下殿言終驗增埤事早萌

先時桑道

茂請修奉天城

蒸雞殊減膳屑麴異和羹否極時還泰屯餘運

果亨流離幾南度倉卒得西平神鬼收昏黑姦凶首

去聲

滿盈官非督護貴師以丈人貞覆載還高下寒暄急改

更馬前烹芥卓壇上揖韓彭扈蹕三才正回軍六合晴

此時唯短劍仍世盡雙旌顧我由羣從逢君歎老成慶

流歸嫡長貼厥在名卿隼擊須當要鵬搏莫問程趨朝
排玉座出位泣金莖幸藉梁園賦叨蒙許氏評中郎推
貴壻定遠重時英政已標三尚人今佇一鳴長刀懸月
魄快馬駭星精披豁慙深眷睽離動素誠蕙留春腕晚
松待歲崢嶸異縣期迴鴈登時已飯鯖去程風刺刺別
夜漏丁丁庾信生多感楊朱死有情絃危中婦瑟甲冷
想夫第會與秦樓鳳俱聽漢苑鶯洛川迷曲沼煙月兩
心傾

詠懷寄秘閣舊僚二十六韻

年鬢日堪悲，衡茅益自嗤。攻文枯若木，處世鈍如鉗。敢望垂堂誡，寧將暗室欺。懸頭曾苦學，折臂反成醫。僕御嫌夫懦，孩童笑叔癡。小男方嗜栗，幼女漫憂葵。遇炙誰先噉，逢塵卽更吹。官銜同畫餅，面貌乏凝脂。典籍將蠹測，文章若管窺。圖形翻類狗，入夢肯非羆。自哂成書麈，終當呪酒卮。懶熏襟上血，羞鑷鏡中絲。橐籥言方喻，樗蒲齒詎知。事神徒惕慮，佞佛愧虛詞。曲藝垂麟角，浮名

狀虎皮乘軒寧見寵巢幕更逢危禮俗拘嵇喜侯王忻
戴逵途窮方結舌靜勝但搯頤糲食空彈劍亭衢詎置
錐栢臺成口號芸閣暫肩隨悔逐遷鶯伴誰觀擇虱時
甕間眠太率牀下隱何卑奮跡登弘閣摧心對董帷校
讎如有暇松竹一相思

戊辰會靜中出貽同志二十韻

大道諒無外會越自登真丹元子何索在已莫問隣
藉燦玉琳華翺翔九真君戲擲萬里火聊召六甲旬瑤簡

被靈誥持符開七門金鈴攝羣魔絳節何飀飀吟弄東
海若倚笑扶桑春三山誠迴視九州揚一塵我本玄元
冑稟華由上津中迷鬼道樂沈為下土民託質屬太陰
鍊形復為人誓將覆宮澤安此真與神龜山有慰薦南
真為彌綸玉管會玄圃火棗承天姻科車過故氣侍香
傳靈芬飄飄被青霓婀娜佩紫紋林洞何其微下仙不
與羣丹泥因未控萬劫猶逡巡荆蕪旣以薶舟壑永無
因相期保妙命騰景侍帝宸

和鄭愚贈汝陽王孫家箏妓二十韻

冰霧怨何窮秦絲嬌未已寒空煙霞高白日一萬里碧
嶂愁不行濃翠遙相倚茜袖捧瓊姿皎日丹霞起孤猿
耿幽寂西風吹白芷迴首蒼梧深女蘿閉山鬼荒郊白
鱗斷別浦晴霞委長釣壓河心白道連地尾秦人昔富
家綠窓聞妙旨鴻驚鴈背飛象牀殊故里因令五十絲
中道分宮徵斗粟配新聲娣姪徒纖指風流大堤上悵
望白門裏蠹粉實雌絃燈光冷如水羌管促蠻柱徒醉

吳宮耳滿內不掃眉吳王對西子初花慘朝露冷臂淒
愁髓一曲送連錢遠別長於死玉砌銜紅蘭粧窓結碧
綺九門十二闕清晨禁桃李

四年冬以退居蒲之永樂渇然有農夫望歲之志
遂作憶雪又作殘雪詩各一百言以寄情於遊
舊

憶雪

愛景人方樂同雲候稍憊徒聞周雅什願賦朔風篇欲

俟千箱慶須資六出妍詠留飛絮後歌唱落梅前庭樹
思瓊蕊粧樓認粉綿瑞邀盈尺日豐待兩岐年預約延
枚酒虛乘訪戴船映書孤志業披氈阻神仙幾向霜堦
步頻將月幌褰玉京應已足白屋但顯然

殘雪

旭日開晴色寒空失素塵遠牆全剝粉傍井漸銷銀刻
獸摧鹽虎為山倒玉人珠還猶照魏壁碎尚留秦落日
驚侵晝餘光誤惜春簷冰滴鷺管屋瓦鏤魚鱗嶺霽嵐

光圻松暄翠粒新擁林愁掃盡著砌恐行頻焦寢忻無
患梁園去有因莫能知帝力空此荷平均

大鹵平後移家到永樂縣居書懷十韻寄劉韋二
前輩二公嘗於此縣寄居

驅馬遶河千家山照露寒依然五柳在况值百花殘昔
去驚投筆今來分掛冠不憂懸磬乏乍喜覆盂安甌破
寧迴顧舟沈豈暇看脫身離虎口移疾就豬肝鬢入新
年白顏無舊日丹自悲秋穫少誰懼夏畦難逸志志鴻

鵲清香披蕙蘭還持一盃酒坐想二公歡

河陽詩

黃龍搖溶天上來玉樓影近中天臺龍頭瀉酒客壽盃
主人淺笑紅玫瑰梓澤東來七十里長溝複塹埋雲子
可惜秋眸一顰光漢陵走馬黃塵起南浦老魚腥古涎
真珠密字芙蓉篇湘中寄到夢不到衰容自去拋涼天
憶得鮫絲裁小卓蛺蝶飛迴木綿薄綠繡笙囊不見人
一口紅霞夜深嚼幽蘭泣露新香死畫圖淺縹松溪水

楚絲微覺竹枝高半曲新詞寫綿紙巴西夜市紅守宮
後房點臂斑斑紅堤南渴鴈自飛久蘆花一夜吹西風
曉簾串斷蜻蜓翼羅屏但有空青色玉彎不釣三千年
蓮房暗破蛟龍惜濕銀注鏡井口平鸞釵映月寒錚錚
不知桂樹在何處仙人不下雙金莖百尺相風插重屋
側近媽紅伴柔綠百勞不識對月郎湘竹千條為一束
自桂林奉使江陵途中感懷寄獻尚書

下客依蓮幕明公念竹林

公與江陵相國詔叙叔姪

縱然膺使命何

以奉徽音投刺雖傷晚酬恩豈在今迎來新瑣闥從到
碧瑤岑水勢初知海天文始識參固慙非賈誼唯恐後
陳琳前席驚虛辱華樽許細斟尚憐秦痔苦不遣楚醪
沈旣載從戎筆仍披選勝襟瀧通伏波柱簾對有虞琴
宅與嚴城接門藏別岫深閣涼松冉冉堂靜桂森森社
內容周續鄉中保展禽白衣居士訪烏帽逸人尋佞佛
將成縛躬書或類淫長懷五穀贖終著九州箴良訊封
駕綺餘光借玳簪張衡愁浩浩沈約瘦悵悵蘆白疑粘

鬢楓丹欲照心歸期無鴈報旅抱有猿侵短日安能駐
低雲只有陰亂鴉銜煦網寒女簇遙砧東道違寧久西
園望不禁江生魂黯黯泉客淚泠泠逸翰應藏法高詞
肯浪吟數須傳庾翼莫獨與盧諶假寐憑書簾哀吟扣
劍鐔未嘗貪偃息那復擬登臨彼美迴清鏡其誰受曲
針人皆向燕路無乃費黃金

送從翁從東川弘農尚書幕

大鎮初更帥嘉賓素見邀使車無遠近歸路便煙霄穩

放驂騑步高安翡翠巢愈風知有在去國肯無聊早忝
諸孫末俱從小隱招心懸紫雲閣夢斷赤城標素女悲
清瑟秦娥弄碧簫山連玄圃近水接絳河遙豈意聞周
鐸翻然慕舜韶皆辭喬木去遠逐斷蓬飄薄俗誰其激
斯民已甚恍鸞鳳期一舉燕雀不相饒敢共頽波遠因
之內火燒是非過別夢時節慘驚飈未至誰能賦中乾
欲病瘳屢曾紆錦繡勉欲報瓊瑤我恐霜侵鬢君先綬
挂腰甘心與陳阮揮手謝松喬錦里差隣接雲臺閉寂

寥一川虛月魄萬崦自芝苗瘴雨瀧間急離魂峽外銷
非關無燭夜其奈落花朝幾處逢鳴珮何筵不翠翹蠻
僮騎象舞江市賣鮫綃南詔知非敵西山亦屢驕勿貪
佳麗地不為聖明朝少減東城飲時看北斗杓莫因乖
別久遂逐歲寒凋盛幕開高宴將軍問故寮為言公玉
季早日棄漁樵

李肱所遺畫松詩書兩紙得四十韻

萬草已涼露開圖披古松青山徧蒼海此樹生何峯孤

根邈無倚直立撐鴻濛端如君子身挺若壯士宵繆枝
勢夭矯忽欲蟠拏空又如驚螭走默與奔雲逢孫枝擢
細葉旖旎孤裘茸鄒顛蓍髮軟麗如姬眉黛濃視久眩
目睛倏忽變輝容竦削正稠直婀娜旋數乍又如洞房
冷翠被張穹籠亦若暨羅女平旦粧顏容細疑襲氣母
猛若爭神功燕雀固寂寂霧露常衝衝香蘭愧傷暮碧
竹慙空中可集呈瑞鳳堪藏行雨龍淮山桂偃蹇蜀郡
桑重童枝條晃眇脫靈氣何由同昔聞咸陽帝近說稽

山儂或著佳人號或以大夫封終南與清都煙雨遙相
通安知夜夜意不起西南風美人昔清興重之猶月鐘
竇笥十八九香緹千萬重一旦鬼瞰室稠疊張羅量赤
羽中要害是非皆怱怱生如碧海月死踐霜郊蓬平生
握中翫散失隨奴僮我聞照妖鏡及與神劍鋒寓身會
有地不為凡物蒙伊人秉茲圖顧盼擇所從而我何為
者開懷捧靈蹤報以漆鳴琴懸之真珠櫳是時方暑夏
座內若嚴冬憶昔謝四騎學仙玉陽東千株盡若此路

入瓊瑤宮口詠玄雲歌手把金芙蓉濃藹深霓袖色映
琅玕中悲哉墮世網去之若遺弓形魄天壇上海日高
瞳瞳終期紫鸞歸持寄扶桑翁

戲題樞言草閣三十二韻

君家在河北我家在山西百歲本無異陰陰仙李枝尚
書文與武戰罷幕府開君從渭南至我自仙遊來平昔
苦南北動成雲雨乖逮今兩攜手對若牀下鞦夜歸碣
石館朝上黃金臺我有苦寒調君抱陽春才年顏各少

壯髮綠齒尚齊我雖不能飲君時醉如泥政靜籌畫簡
退食多相攜掃掠走馬路整頓射雉翳春風二三月柳
密鶯正啼清河在門外上與浮雲齊歌冠調玉琴彈作
松風哀又彈明君怨一去怨不迴感激坐者泣起視鴈
行低翻憂龍山雪却雜胡沙飛仲容銅琵琶項直聲淒
淒上貼金捍撥畫為承露雞君時卧張觸勸客白玉盃
苦云年光疾不飲將安歸我賞此言是因循未能諧君
言中聖人坐卧莫我違榆莢亂不整楊花飛相隨上有

白日照下有東風吹青樓有美人顏色如玫瑰歌聲入
青雲所痛無良媒少年苦不久顧慕良難哉徒令真珠
牀裏入珊瑚腮君今且少安聽我苦吟詩古詩何人作
老大徒傷悲

偶成轉韻七十二句贈四同舍

沛國東風吹大澤蒲青柳碧春一色我來不見隆準人
漉酒空餘廟中客征東同舍鴛鴦與鸞酒酣勸我懸征鞍
藍山寶肆不可入玉中仍是青琅玕武威將軍使中俠

少年箭道驚楊葉戰功高後數文章憐我秋齋夢蝴蝶
詰旦九門傳奏章高車大馬來煌煌路逢鄒枚不暇揖
臘月大雪過大梁憶昔公為會昌宰我時入謁虛懷待
衆中賞我賦高唐迴看屈宋猶年輩公事武皇為鐵冠
厯廳請我相所難我時憔悴在書閣卧枕芸香春夜闌
明年赴辟下昭桂東郊慟哭辭兄弟韓公堆上跋馬時
迴望秦川樹如薺依稀南指陽臺雲鯉魚食鉤猿失羣
湘妃廟下已春盡虞帝城前初日曛謝遊橋上澄江館

下望山城如一彈。鷓鴣聲苦曉驚眠。朱槿花嬌晚相伴。
頃之失職辭南風。破帆壞檣荆江中。斬蛟破壁不無意。
平生自許非忽忽。歸來寂寞靈臺下。著破藍衫出無馬。
天官補吏府中趨。玉骨瘦來無一把。手封狴牢屯制囚。
直廳印鎖黃昏愁。平明赤帖使修表。上賀嫖姚收賊州。
舊山萬仞青霞外。望見扶桑出東海。愛君憂國去未能。
白道青松了然在。此時聞有燕昭臺。挺身東望心眼開。
且吟王粲從軍樂。不賦淵明歸去來。彭門十萬皆雄勇。

首戴公恩若山重廷評日下握靈蛇書記眠時吞綵鳳
之子夫君鄭與裴何生謝舅當世才青袍白簡風流極
碧沼紅蓮傾倒開我生麤疎不足數梁父哀吟鵠鵲舞
橫行濶視倚公憐狂來筆力如牛弩借酒祝公千萬年
吾徒禮分常周旋收旗卧鼓相天子相門出相光青史
今月二日不自量度輒以詩一首四十韻干瀆尊
嚴伏蒙仁恩俯賜披覽獎踰其實情溢於詞顧
唯疎蕪曷用酬戴輒復五言四十韻詩一章獻

上亦詩人詠歎不足之義也

家擅無雙譽朝居第一功四時當首夏八節應條風滌

濯臨清濟巉巖倚碧嵩鮑壺冰皎潔王佩玉丁東

擊虞決錄

要注云漢末絕無玉佩侍中王粲識舊佩始復作之今玉佩受法於粲也故云

處劇張京兆通

經戴侍中將星臨迴夜卿月麗層穹下令銷秦盜高談

破宋輦含霜太山竹拂霧嶧陽桐樂道乾知退當官蹇

匪躬服箱青海馬入兆渭川熊固是符真宰徒勞讓化

工鳳池春燕濫雞樹曉瞳矐願守三章約還期九譯通

薰琴調大舜寶瑟和神農慷慨資元老周旋值狡童仲
尼羞問陳魏絳喜和我款款將除蠹孜孜欲達聰所求
因渭濁安肯與雷同物議將調鼎君恩忽賜弓開吳相
上下全蜀占西東銳卒魚懸餌豪胥烏在籠疲民呼杜
母隣國仰羊公置驛推東道安禪合北宗嘉賓增重價
上士悟真空扇舉遮王導樽開見孔融煙飛愁舞罷塵
起惜歌終岸柳兼池綠園花映燭紅未曾周顗醉轉覺
季心恭繫滯喧人望便蕃屬聖衷天書何日降庭燎幾

時烘早歲乖投刺今晨幸發蒙遠途哀跛鼃薄藝與雕蟲故事曾尊隗前修有薦雄終須煩刻畫聊擬更磨礪蠻嶺晴留雪巴江晚帶楓營巢憐越燕裂帛待燕鴻自苦誠先藥長飄不後蓬容華雖少健思緒卽悲翁感激淮山館優游碣石宮待公三八相丕祚始無窮

五言述德抒情詩一首四十韻獻上杜七兄僕射
相公

帝作黃金闕仙開白玉京有人扶太極維岳降元精耿

賈官勲大荀陳地望清旂常懸祖德甲令著嘉聲經出
宣尼壁書留晏子楹武鄉傳陣法踐土主文盟自昔流
王澤由來仗國楨九河分合沓一柱忽崢嶸得主勞三
顧驚人肯再鳴碧虛天共轉黃道日同行後飲曹參酒
先和傳說羹即時賢路闢此夜泰階平願保無疆福將
圖不朽名率身期濟世叩額慮興兵感念峭屍露咨嗟
趙卒坑儻令安隱忍何以贊貞明惡草雖當路寒松實
挺生人言真可畏公意本無爭故事留臺閣前驅且旆

旌芙蓉王儉府楊柳亞夫營清嘯頻疎俗高談屢析酲
過庭多令子乞墅有名甥南詔應聞命西山莫敢驚寄
詞收的博端坐掃攬槍雅宴初無倦長歌底有情檻危
春水暖樓迴雪峯晴移席牽綳蔓迴撓撲絳英誰知杜
武庫只見謝宣城有客趨高義於今滯下卿登門慙後
至置驛恐虛迎自是依劉表安能比老彭雕龍心已切
畫虎意何成豈省曾黔突徒勞不倚衡乘時乖巧宦占
象合艱貞廢忘淹中學遲迴谷口耕悼傷潘岳重樹立

馬遷輕隴鳥悲丹嘴相蘭怨紫莖歸期過舊歲旅夢繞
殘更弱植叨華族衰門倚外兄欲陳勞者曲未唱淚先
橫

驕兒詩

衮師我驕兒美秀乃無匹文葆未周晬固已知六七四
歲知姓名眼不視梨栗交朋頗窺觀謂是丹穴物前朝
尚器貌流品方第一不然神仙姿不爾燕鶴骨安得此
相謂欲慰衰朽質青春妍和月朋戲渾甥姪繞堂復穿

林沸若金鼎溢門有長者來造次請先出客前問所須

含意不吐實歸來學客面闕敗東耶笏或謔張飛胡或

笑鄧艾吃豪鷹毛崩

化力反

劣

良直反

猛馬氣佶僇

離直反

截

得青簣

于君反

當騎走恣唐突忽復學參軍按聲喚蒼鶻

又復紗燈旁稽首禮夜佛仰鞭罨蛛網俯首飲花蜜欲

爭蛺蝶輕未謝柳絮疾階前途阿姊六甲頗輸失疑走

弄香奩拔脫金屈戌抱持多反側威怒不可律曲躬牽

窓網絡唾拭琴漆有時看臨書挺立不動膝古錦請裁

衣玉軸亦欲乞請耶書春勝春勝宜春日芭蕉斜卷牋
辛夷低過筆耶昔好讀書懇苦自著述憔悴欲四十無
肉畏蚤虱兒慎勿學耶讀書求甲乙穰苴司馬法張良
黃石術便為帝王師不假更纖悉況今西與北羌戎正
狂悖誅赦兩未成將養如痼疾兒當速成大探雛入虎
窟當為萬戶侯勿守一經帙

行次西郊作一百韻

蛇年建丑月我自梁還秦南下大散關北濟渭之濱草

木半舒圻不類冰霜晨又若夏苦熱焦卷無芳津高田
長槲櫨下田長荆榛農具棄道旁飢牛死空塹依依過
村落十室無一存存者背面啼無衣可迎賓始若畏人
問及門還具陳右輔田疇薄斯民嘗苦貧伊昔稱樂土
所賴牧伯仁官清若冰玉吏善如六親生兒不遠征生
女事四隣濁酒盈瓦缶爛穀堆荆困健兒疵旁婦衰翁
舐童孫況自貞觀後命官多儒臣例以賢牧伯徵入司
陶鈞降及開元中姦邪撓經綸晉公忌此事多錄邊將

勲因令猛毅輩雜牧昇平民中原遂多故除授非至尊
或出倖臣輩或由帝戚恩中原困屠解奴隸厭肥豚皇
子棄不乳椒房抱羌渾重賜竭中國強兵臨北邊控弦
二十萬長臂皆如猿皇都三千里來往同鷗鳶五里一
換馬十里一開筵指顧動白日煖熱迴蒼旻公卿辱嘲
叱唾棄如糞九大朝會萬方天子正臨軒綵旂轉初旭
玉座當祥煙金障旣特設珠簾亦高褰將須蹇不顧坐
在御榻前忤者死跟屨附之昇頂顛華侈矜迤街豪俊

相併吞因失生養惠漸見徵求頻奚寇西北來揮霍如
天翻是時正忘戰重兵多在邊列城遶長河平明插旗
幡但聞虜騎入不見漢兵屯大婦抱兒哭小婦攀車轡
生小太平年不識夜閉門少壯盡點行疲老守空村生
分作死誓揮淚連秋雲廷臣例屢怯諸將如羸奔為賊
掃上陽捉人送潼關玉輦望南斗未知何日旋誠知開
闢久邁此雲雷屯送者問鼎大存者要高官搶攘互間
謀孰辨梟與鸞千馬無返轡萬車無還轅城空雀鼠死

人去豺狼喧南資竭吳越西費失河源因令左藏庫推
毀唯空垣如人當一身有左無右邊筋體半痿痺肘腋
生臊臙列聖蒙此恥含懷不能宣謀臣拱手立相戒無
敢先萬國困杼軸內庫無金錢健兒立霜雪腹歉衣裳
單饋餉多過時高估銅與鉛山東望河北爨煙猶相聯
朝廷不暇給辛苦無半年行人權行資居者稅屋椽中
間遂作梗狼籍用戈鋌臨門送節制以錫通天班破者
以族滅存者尚遷延禮數異君父羈縻如羌零直求輸

赤誠所望大體全巍巍政事堂宰相厭八珍敢問下執
事今誰掌其權瘡疽幾十載不敢抉其根國威賦更重
人稀役彌繁近年牛醫兒城社更扳緣盲目把大旆處
此京西藩樂禍忘怨敵樹黨多狂狷生為人所憚死非
人所憐快刀斷其頭列若猪羊懸鳳翔三百里兵馬如
黃巾夜半軍牒來屯兵萬五千鄉里駭供億老少相扳
牽兒孫生未孩棄之無慘顏不復議所適但欲死山間
爾來又三歲甘澤不及春盜賊亭午起問誰多窮民節

使殺亭吏捕之恐無因咫尺不相見
旱久多黃塵官健腰佩刀自言為
官巡常恐值荒迴此輩還射人愧客
問本末願客無因循鄙塢抵陳倉
此地忌黃昏我聽此言罷冤憤如
相焚昔聞舉一會羣盜為之奔又
聞理與亂繫人不繫天我願為此
事君前剖心肝叩頭出鮮血滂沱
汚紫宸九重黯已隔涕泗空沾唇
史典作尚書廝養為將軍慎勿道
此言此言未忍聞

井泥四十韻

皇都依仁里西北有高齋昨日主人氏治井堂西陞工
人三五輩輦出土與泥到水不數尺積共庭樹齊他日
井甃畢用土益作堤曲隨林掩映繚以池周迴下去冥
冥穴上承雨露滋寄詞別地脉因言謝泉扉昇騰不自
意疇昔忽已乖伊余掉行執行行來自西一日下馬到
此時芳草萋四面多好樹旦暮雲霞姿晚落花滿池幽
鳥鳴何枝蘿幄旣已薦山樽亦可開待得孤月上如與
佳人來因之感物理惻愴平生懷茫茫此羣品不定輪

與蹄喜得舜可禪不以瞽瞍疑禹竟代舜立其父吁咈
哉嬴氏并六合所來因不韋漢祖把左契自言一布衣
當塗佩國璽本乃黃門攜長戟亂中原何妨起戎氐不
獨帝王耳臣下亦如斯伊尹佐興王不藉漢父資磻溪
老釣叟坐為周之師屠狗與販繒突起定傾危長沙啓
封土豈是出程姬帝問主人翁有自賣珠兒武昌昔男
子老苦為人妻蜀王有遺魄今在林中啼淮南雞舐藥
翻向雲中飛大釣運羣有難以一理推顧於冥冥內為

問東者誰我恐更萬世此事愈云為猛虎與雙翅更以
角副之鳳凰不五色聯翼上雞棲我欲秉釣者竭來與
我偕浮雲不相顧寥泝誰為梯悵快夜參半但歌井中
泥

續新添二十六首

夜思

銀箭耿寒漏金釭凝夜光彩鸞空自舞別燕不相將寄
恨一尺素含情雙玉璫會前猶月在去後始宵長往事

經春物前期托報章永令虛架枕長不掩蘭房覺動迎
猜影疑來浪認香鶴應聞露警蜂亦為花忙古有陽臺
夢今多下蔡倡何為薄冰雪消瘦滯非鄉

思賢頓

內殿張絃管中原絕鼓輦舞成青海馬鬪殺汝南雞不
見華胥夢空聞下蔡迷宸襟他日淚薄暮望賢西

無題

萬里風波一葉舟憶歸初罷更夷猶碧江地沒元相引

黃鶴沙邊亦少留，益德冤魂終報主。
阿童高義鎮橫秋，人生豈得長無謂。
懷古思鄉共白頭。

有懷在蒙飛卿

薄官頻移疾，當年久索居。
哀同庾開府，瘦極沈尚書。
城綠新陰遠，江清返照虛。
所思唯翰墨，從古待雙魚。

春深脫衣

脾睨江鴉集，堂皇海燕過。
減衣憐蕙若，展障動煙波。
日烈憂花甚，風長奈柳何。
陳遵容易學，身世醉時多。

懷求古翁

何時粉署仙傲兀逐戎旃關塞猶傳箭江湖莫繫船欲
收棋子醉竟把釣車眠謝朓真堪憶多才不忌前

五月六日夜憶往歲秋與散師同宿

紫閣相逢處丹巖議宿時墮蟬翻敗葉棲鳥定寒枝萬
里飄流遠三年問訊遲炎方憶初地頻夢碧琉璃

城上

有客虛投筆無寥獨上城沙禽失侶遠江樹著陰輕邊

遽稽天討軍須竭地征賈生遊刃極作賦又論兵

江上憶嚴五廣休

征南幕下帶長刀夢筆深藏五色毫逢著澄江不敢詠
鎮西留與謝功曹

如有

如有瑤臺客相難復索歸芭蕉開綠扇菖蒲薦紅衣浦
外傳光遠煙中結響微良宵一寸艷回首是重幃

朱槿花二首

蓮後紅何患梅先白莫誇纔飛建章火又落赤城霞不
卷錦步障未登油壁車日西相對罷休幹向天涯
勇多侵路去恨有礙燈還嗅自微微白看成沓沓殷坐
疑忘物外歸去有簾間君問傷春句千詞不可刪

寓懷

彩鸞食顥氣威鳳食卿雲長養三清境追隨五帝君煙
波遺汲汲矰繳任云云下界圍黃道前程合紫氛金書
唯是見玉管不勝聞草為迴生種香緣却死熏海明三

島見天迴九江分
塞樹無勞援神禾
豈用耘關龍風結
陣惱鶴露成文
漢殿霜何早
秦宮日易曛
星機拋密緒
月杵散靈氛
陽鳥西南下
相思不及羣

木蘭

二月二十二木蘭開
拆初初當新病
酒復自久離居愁
絕更傾國
敬駕新聞遠
書紫絲何日障
油壁幾時車
弄粉知傷重
調紅或有餘
波痕空映襪
煙態不勝裾
桂嶺含芳遠
蓮塘屬意踈
瑤姬與神女
長短定何如

細雨成詠獻尚書河東公

洒砌聽來響卷簾看已迷江間風暫定雲外日應西
稍落蝶粉斑斑融燕泥颭萍初過沼重柳更緣堤
必擬和殘漏寧無晦暝聲半將花漠漠全共草萋萋
猿別方長嘯烏驚始獨棲府公能八詠聊且續新題

病中聞河東公樂營置酒口占寄上

聞駐行春旂中途賞物華緣憂武昌柳遂憶洛陽花
嵇鶴元無對荀龍不在誇只將滄海月長壓赤城霞
興欲

傾燕館歡於到習家風長應側帽

獨孤景公信舉止風流常風吹帽傾觀者

塞路路監豈容車

相逢狹路間路監不容車

樓迴波窺錦窓虛日弄紗

鎖門金了鳥展障玉鴉義舞妙從兼楚歌能莫雜巴必

投潘岳果誰摻禰衡槌

禰處士擊鼓能為漁陽摻槌

刻燭當時忝傳

孟此夕賒可憐漳浦卧愁緒獨如麻

回中牡丹為雨所敗二首

下苑他年未可追西州今日忽相期水亭暮雨寒猶在

羅薦春香暖不知舞蝶殷勤收落蓋有人惆悵卧遙帷

章臺街裏芳菲伴且問宮腰損幾枝

浪笑榴花不及春先期零落更愁人玉盤迸淚傷心數
錦瑟驚絃破夢頻萬里重陰非舊圃一年生意屬流塵
前溪舞罷君迴顧併覺今朝粉態新

擬意

悵望逢張女遲迴送阿侯空看小垂手忍問大刀頭妙
選茱萸帳平居翡翠樓雲屏不取暖月扇未障羞上掌
真何有傾城豈自由楚妃交薦枕漢后共藏闔夫向羊

車覓男從鳳穴求書成袂袂帖唱殺畔牢愁夜杵鳴江
練春刀解若榴象牀穿憶網犀帖釘窓油仁壽遺明鏡
陳倉拂綵毬真防舞如意佯蓋卧瑩篴濯錦桃花水濺
裙杜若洲魚兒懸寶劍燕子合金甌銀箭催搖落華筵
慘去留幾時銷薄怒從此抱離憂帆落啼猿峽樽開畫
鷁舟急絃腸對斷翦蠟淚爭流壁馬誰能帶金蟲不復
收銀河撲醉眼珠串咽歌喉去夢隨川后來風貯石郵
蘭叢銜露重榆莢點星稠解珮無遺跡凌波有舊遊曾

來十九首私識詠牽牛

謝往桂林至彤庭竊詠

辰象森羅正鈎陳翊衛寬魚龍排百戲劍珮儼千官城
禁將開晚宮深欲曙難月輪移杓詣仙路下欄杆共賀
高禔應將陳壽酒歡金星壓芒角銀漢轉波瀾王母來
空閭羲和上屈盤鳳凰傳詔旨獬豸冠朝端造化中台
座威風大將壇甘泉猶望幸早晚冠呼韓

燒香曲

鈿雲蟠蟠牙比魚孔雀翅尾蛟龍鬚漳宮舊樣博山爐
楚嬌捧笑開芙蓉八蠶繭綿小分炷獸燄微紅隔雲母
白天月澤寒未永金虎含秋向東吐玉珮呵光銅照昏
簾波日暮衝斜門西來欲上茂陵樹栢梁已失栽桃魂
露庭月井大紅氣輕衫薄細當君意蜀殿瓊人伴夜深
金鑾不問殘燈事何當巧吹君懷度襟灰為土填清露

失題

昔帝迴冲眷維皇側上仁三靈迷赤氣萬彙叫蒼旻刊

木方隆禹升陟始創殷夏臺曾圯閉汜水敢逡巡極弱
休規步防虞要徙薪蒸黎今得請宇宙昨還淳續祖功
宜急貽孫計甚勤降灾雖代有稔惡不無因宮掖方為
蠱邊隅忽遽述獻書秦逐客間課漢名臣北伐將誰使
南征決此辰中原重板蕩玄象失鉤陳詰旦違清道銜
枚別紫宸茲行殊厭勝故老遂分新去異封於輦來寧
避處幽永嘉幾失墜宣政遽酸辛元子當傳啓皇孫合
授詢時非三揖讓表請再陶鈞舊好盟還在中樞策屢

遵蒼黃傳國爾墨遠屬車塵雛虎如憑怒漿龍性漫馴
封崇自何等流落乃斯民逗撓官軍亂優客敗將頻早
朝披草莽夜縋達絲綸忘戰追無及長驅氣益振婦言
終未易廟略况非神日馭難淹蜀星旄要定秦人心誠
未去天道亦無親錦水前雲浪黃山掃地春斯文虛夢
鳥吾道欲悲麟斷續殊鄉淚存亡滿席珍魂銷李蒸竇
衣化子張紳建議庸何所通班昔濫臻浮生見開泰獨
得詠汀蘋

晉昌晚歸馬上贈

西北朝天路登臨思上才
城閒煙草遍村暗雨雲迴
人豈無端別猿應有意哀
征南予更遠吟斷望鄉臺

哭虔州楊侍郎

虞卿

漢網疎仍漏齊民困未蘇
如何大丞相翻作弛刑徒
中

憲方外易

史記云商鞅多左建外易

尹京終就拘本矜能弭謗先議

取非辜巧有凝脂密功無一柱扶
深知獄吏貴幾迫季冬誅
叫帝青天濶辭家白日晡
流亡誠不弔神理若為

誣在昔恩知忝諸生禮秩殊入韓非劍客過趙受鉗奴

楚水招魂遠邛山卜宅孤甘心親埴蟻旋踵戮城狐

是冬

舒李陰隲今如此天灾未可無莫憑牲玉請便望救焦

枯

寄太原盧司空三十韻

隋艦臨淮甸唐旗出井陘斷鼉摵四柱卓馬濟三靈祖
業隆盤古孫謀復大庭從來師傑俊可以煥丹青舊族
開東岳雄圖奮北溟邪同獬豸觸樂伴鳳凰聽酣戰仍

揮日降妖亦鬪霆將軍功不伐叔舅德唯馨雞塞誰生
事狼煙不暫停擬填滄海鳥敢競太陽螢內草纔傳詔
前茅已勒銘那勞出師表盡入大荒經德水縈長帶陰
山繚畫屏只憂非祭肯未覺有臙腥保佐資冲漠扶持
在杳冥乃心防暗室華髮稱明廷按甲神初靜揮戈思
欲醒義之當妙選小弟義叟早
蒙春以嘉姻孝若近歸寧三十五丈
明府高科
來歸膝下月色來侵幌詩成有轉櫺羅含黃菊宅柳惲白蘋
汀神物龜酬孔仙才鶴姓丁西山童子藥南極老人星

自頃徒窺管於今愧挈瓶何由叨末席還得叩玄扃莊
叟虛悲鴈終童漫識鼙幕中雖策畫劍外且伶俜俟俟
行忘止鰥鰥卧不瞑身應瘠於魯淚欲溢為榮禹貢思
金鼎堯圖憶土釧公乎來入相王欲駕云亭

安平公詩

故贈尚書韓氏

丈人博陵王名家憐我總角稱才華華州留語曉至暮
高聲唱吏放兩衙明朝騎馬出城外送我習業南山阿
仲子延岳年十六面如玉歌烏紗其弟炳章猶兩州

瑤林瓊樹含奇花陳留阮家諸姪秀遷迤出拜何駢羅
府中從事杜與李麟角虎翅相過摩清詞孤韻有歌響
擊觸鐘磬鳴環珂三月石堤凍銷釋東風開花滿陽坡
時禽得伴戲新木其聲尖咽如鳴梭公時載酒領從事
踴躍鞍馬來相過仰看樓殿撮清漢坐視世界如恒沙
面熱脚掉互登陟青雲表柱白雲崖一百八句在貝葉
三十三天長雨花長者子來輒獻蓋辟支佛去空留鞿
公時受詔鎮東魯遣我草詔隨車牙顧我下筆卽千字

疑我讀書傾五車
嗚呼大賢苦不壽
時世方士無靈砂
五月至止六月病
遽頽泰山驚逝波
明年徒步弔京國
宅破子毀哀如何
西風衝戶卷素帳
隙光斜照舊燕窠
古人常歎知己少
况我淪賤艱虞多
如公之德世一二
豈得無淚如黃河
漚澹呪願天有眼
君子之澤方滂沱

李義山詩集卷下